

四庫全書

集部

欽定四庫全書

集部
青崖集卷二

詳校官中書臣徐志晉

侍讀臣孫球覆勘

騰錄貢生王穀

騰錄舉人范翔集

欽定四庫全書

集部五

提要

青崖集五卷

別集類四元

臣等謹案青崖集五卷元魏初撰初字太初

號青崖宏州順聖人從祖璠金末官翰林修

撰以伉直稱元世祖徵至和林甚見禮重璠

無子以初為後少辟中書省掾史告歸有薦

於朝者帝問知璠子即授國史院編修尋拜

監察御史官至南臺御史中丞事蹟具元史
本傳焦竑經籍志載魏初青崖集十卷文淵
閣書目亦載魏太初青崖文集一部七冊是
明初原集尚存其後乃漸就亡佚今從永樂
大典所載詩文搜輯裒綴釐為五卷猶可見
其崖畧史稱初好讀書尤長於春秋為文簡
而有法而集中所記自稱與姜彧同孱遺山
先生教誨又稱先生入燕初朝夕奉杖屨是

其學本出元好問具有淵源故所作皆格律
堅蒼不失先民軌範又其在世祖時始以經
進讀旋歷諫職遇事敢言開國規模多所裨
益集中奏議一門皆詳識歲月分條臚列中
如請定法令請肅朝儀元史皆採入本傳中
其他若請緩椿配鹽貨請禁刁蹬客米請優
護儒戶請旌鄭江死節請修孟子廟請和顧
工匠請罷河南簽軍諸議史所未載者類皆

當時要務切中事情今幸遺集僅存尤足以
補史闕固不徒以文章貴矣乾隆四十六年
九月恭校上

總纂官臣紀昀臣陸錫熊臣孫士毅

總校官臣陸費擘

欽定四庫全書

青崖集卷一

元魏初撰

五言古詩

奉答楊左丞詩

并序

左丞相公

公宋駙馬姓楊氏名
鎮今江西行省左丞

自江西來杭

不鄙不肖以詩見示擬古云志士多苦心觀

梅云月淡溪橋浸踈影雪深籬落見橫枝漁

村云籬燈吐秋影岸荻長春芽野水一雙鷺

暮煙三四家維揚遣懷云夢回孤館人千里
漏轉重城月一樓客中清明云滿眼落花隨
水去無情垂柳共春愁秋色云涼月一江翻
夜白夕陽千樹奪春紅和周公謹韻云村酒
黃花九日後曉霜紅葉兩山秋登孺子亭云
春樹倚簷分浦色暮雲含雨渡江心寄林上
人云林樹有無生雨氣野花開落見春心似
此等句皆清峻有古意前賢謂文章之作恒

發於流離困頓憔悴無聊不平之中今相君
生長富貴不為聲色狗馬所奪每興懷託物
乃能造此雅澹境界非其篤好而才品不凡
者未易及之敢作古語一章奉答厚意

風雅日已遠嘲評月露多况當紈綺貴此意竟如何左
轄膺朝寄瘡痍仰撫摩一斑時爾見清峻湧江波好在
都俞際賡吟舜殿歌

三月廿九日郡庠後亭讌盧啟先僉事

晨集穎江階列席當蕙邊斯亭信顯敞翠嶺帶澄川潮
駕宜城步山積司空原青松紛被徑紅桃競發園衆賓
起為壽繁音出嬌絃中觴念遠離歲行已再遷漂萍有
時合浮雲未見旋今朝不為樂來會知何年

安慶郡庠後亭讌董僉事

鯨鯢起淮服郡邑盡燒殘茲城獨完好使者一開顏省
風降文囿弭節遵曲干雙池夾行徑累榭在雲間天遠
羣峯出地迥滄江還霞生射蛟室鴈沒逢龍山開罇華

堂上命酌頻危關主人送瑤爵但云嘉會難豈為杯酒
驩樂此罷民安魄淵無恒彩清川有急瀾明晨起駉服
相望阻重關

王仲思所藏幸蜀圖

小李將軍畫

曩予按川蜀此道凡九過仰高如梯登遇下若井墮崎
嶇百險中平步得幾箇朝來拂橫披恍若有今我因思
開元初四海樂恬安米帛三四錢萬里絕戍邏華清歌
舞時已構此坎珂不獨君王家人生械亦巨將軍豈無

心可以銘諸座

匏瓜詩

并序

禹卿趙君別墅築亭曰匏瓜諸公咸有歌詠
初不揆以淵明戶庭無塵雜虛室有餘閑作
十詩以道其閒適之意在風俗奔競中獨能
操守如此其亦可尚矣

出城十里餘小小築園圍牆頽補青山月冷杵秋黍蕭
然無人來風葉擁庭戶

志意若不足文書官有程何如田畝間脫落塵土星時
時有佳客爛醉秋風庭

此書不可廢此酒不可無醒時自澆酒醉後還枕書人
生天地間窮達竟何如

人皆有樂地百偽奪其真朝趨富兒屋莫隨肥馬塵不
知竟何得空負百年身

青雲半知己遐邇非寡合持身自有道許與不可雜君
看誰卜隣慎獨有懸榻

非無功名心樂此樵與漁炎涼各以時知力誰能渝蕭
然一亭上心境還清虛

只今終南山亦自有少室捷徑以索價茲心素所疾一
匏無餘事優游保清吉

匏瓜聖所喻繫著亦何有時行與時止豈復論竒偶聊
以名茲亭拍塞貯春酒

築亭瞰平野四望情意舒青山入座來尊俎雜肴蔬雖
無九鼎侈此樂亦有餘

以君邁往氣未必能久間唯其不自售所以行之艱作
詩固可工亦可厲癡頑

楊庸齋移竹二首

子雲築新居瀟洒過日月一官笑鄭虔忍為塵埃沒歸
來謝俗聲山影動簷樾看此渭川秋萬古幽興發

青青河畔柳旋挿旋成陰天天溪上桃蓓蕾開紅金誰
能愛吾竹過眼從蕭森涼風歲云莫乃見高人心

閑居禱詠五首

家貧人事稀蕭索坐茅屋雖無舟楫心詩書敢私淑高
卧北窻下清風響梧竹

聖道宜遠人其源由洒掃惟彼賢達人樂以不知老喟
然嘗自傷立身苦不早

朱墨生涯拙青銅勲業羞三山鳳伏月萬里鷹搏秋時
時拂塵卷造物何悠悠

人生百年內憂虞何時歇不如棄塵事讀書古松檜偉
哉聖賢心秋波湛明月

傷彼蕙蘭花不結君王池
秋露有肅殺落日空山陂
良無呈瑞姿虛名將奚為

為廉公迪壽

矯矯廉泉公有子今公迪
讀書達事體意遠文且質
余茲何幸焉得與共憲職
但願君侯心敬慎恒若一

諸葛武侯

漢運固已厄臣心無偏安
出師非倖功為國將勝殘
所當盡者分不可期者天
至今原上草慘慘縈愁煙

七言古詩

猷畝謠為馬丈師易壽

君不見阿衡畎畝一餓叟孰謂乃有堯之心以身許毫
即自任從容一理無升沉又不見陶家松石草堂月萬
古笑傲聲輝發即今有人誰似之介山處士心如雪怡
情抱蒿萊教子付塾說一家唐舜民肯事張儀舌先生
于茲一何少先生於茲又何拙世間碌碌不足數賴有
天徒與吾語茫茫四海少顏色會當下筆生風雨

為樸散提刑壽

精神滿腹眼如漆落筆蛟虬大如尺君侯累世公卿
家清議到君能事畢憶昨臺中初見時虎頭金節含
春姿陪從評議得梗槩磊磊落落青松枝相期不得
長相與汧隴秋煙漢城雨今年駐馬鳳凰泉定教有
此青燈語便當載酒三百壺對君城南梅花株為君
上壽為君舞醉倒不用春風扶

趙公泉

趙公智者流樂水性其天居人慕公義以公名公泉
巉巉石齒作細穿引渠厨屋清涓涓西盤東鍾各有
用門前半溉桑麻田微雨乍添春蕩漾輕風細蹙秋
淪漣行潦之水無根源豈能逝者如斯川泉石之娛
君實賢我意愛君或不然東甫妖氛今未已要君倒
卷黃河湔

趙樊川

四十塊坐未出門樊川佳處來傳聞就中韋杜稱第

一贊皇趙公今主人主人本是風雲客
斡旋造化工彌綸西南雨漏不可塞
以手補之天為新慨然拂却長安塵
移家要與黃溪隣霜葉煙花秋復春
十年人仰樊川君鶴書一夕復徵辟
玉案主峯澹空碧巾車迢迢入燕國
前日所聞今始識相逢重索城南詩
才薄空慚少陵筆

送王敬之御史耿伯玉臺掾東歸

敬之方平尚質直伯玉謨謀加緻密
中臺二妙卓有

聲驄馬西來能事畢繡衣東望五雲深
盧龍煙草金溝水欲知別後憶君時
萬疊秦山秋雨裏

題趙明叔未央瓦硯

淒淒古月土花碧溜雨秋簷照螢濕
龍拏虎搏二千年火烈風摧見枯質
鉛香蝕盡星蕭蕭又逐幽人入
潛室繁華百閱無好心淨涵秋波墨
如漆神工巧護有所持主人鄭重董
狐筆

書聽琴賦卷後

寥休愛君如愛弟為君賦此盡琴意寥休既作汗漫
遊今君亦從此而逝嗚呼天地誰知音明月高山與
流水

鳳翔城南得京都家書

鳳翔城南山路迷鳳翔城東人來稀黃塵鞍馬偶相
及乃是史子京都歸倉忙問訊語未已手出平安遺
我思開緘一讀為再讀咫尺慈顏不遠違忽忽二月
長安道南北馳心似秋草女孫解語學念詩應道在

家貧亦好

雜言送劉樂二公

君看冀北馬逸足一展無九州黃金絡頭亦不惡要與
八駿追真遊君看萬里鵠六翮搏清秋安能只作梁上
燕銜泥附熱空啁啾吾家劉兄誰與儔濟物不減商川
舟吾家樂弟師前修慷慨已識元龍樓酒酣氣張吐奇
焰霹靂墮地騰蛟蚪世間俗事不著眼况復筆墨錫頑
鯁南風吹雲動高興擎舟吸翠灤江頭江頭去天才三

尺傾肝露膽皆公侯乃知君家富貴本易取落落不必
工雕鏤我窮閉門秋水隈買田無力耕無牛墻根草色
上階綠雨中破屋枝撐幽不獨人嗟我亦嗟直以不愧
消百憂因君作別一大笑始信寓說未易齊鵬鳩

杭州大雲

并序

至元二十有一年十二月七日杭州大雲之明
日偕中丞楊子裕治書侍御史張夢符自湧
金門登舟謁林和靖祠過太一宮凭欄四望

吳山諸峯瓊樓玉樹上下一色日光皎然不
敢正視長時在煙雨空濛中忽覩此晴霽亦
竒觀也夢符走筆賦長語數韻初不揆度牽

强奉次

寸腸不用多蟠結千計百思徒屑屑春風昨夜到梅花
况是西湖好晴雪平時走馬入燕雲不憶扁舟落江浙
人生南北亦偶然造物何嘗管調燮竹梢松滴玉零星
一樣林逋詩苦冽神仙官府小洞天琴鶴正為我輩設

酒酣擊楫回中流江山逸興悠然發自憐青鬢已如絲
只有丹心猶似鐵

利州值雪次張周卿韻

至元丁丑冬分覈東川趨中臺二妙霍與張適與會遇
成同途朝行長林夜守更語話情切忘崎嶇偶然雪嶺
滑復滑驛騎凡劣不可驅一日凡五墜五墜之外猶可
探驪珠黃泥滿身不足笑大笑駭僕汝墜汝復來吾扶
相看大咤復相語誰遣不守君家株我時酒熱氣已張

乃謂此亦何足成嗟吁與君更約明年行共看夔州八
陣圖

題歸潛洞

巔崖鑿透苔花碧
遶磴風來竹香濕
龍頭蛻骨蟄不飛
老榼中朽含古質
橫林六月秋生衣
垂簾冬夜春浮筆
主人夢覺邯鄲來
乍得幽深快胃臆
君不見玉關將軍
冰雪肌廟堂謨臣
安危機一發不中
羣口譏昨日把笏
今扶犁誰知趙侯
鬢未衰中流勇退
世所推却愁此志

不終遂再使騰踏今昌期

送趙大中從李五祖奉祀嶽瀆

男兒兀坐近四十骨弱心痿徒補輯
遶床百匝呼少陵
安得秋風生羽翼吾家趙弟本不凡
鬢禿鬚長眼如漆
江海方期汗漫遊一夕飛緘御香濕
天台真人馬子徵
愛君能詩重君筆太華峯頭日觀西
萬壑風煙入呼吸
歸來落紙中書堂頓覺吾輩生輝光
青雲從此一萬丈
回首俗物都茫茫

登朝天嶺

余來漢中凡三年大山小山行欲遍今年復有東川行
大抵勢隨崗阜轉石頭犖确顛且危不獨心驚夢亦戰
利州城北到朝天又是川行山一變懸崖皴澁留苔青
石罅陰森鬱松篁得詩數語疑有神得酒百杯亦不倦
回環應接竒無窮乃見平時所未見落落參軍正紫髯
行行御史真鐵面相看大醉復長歌滅沒春鴻天一線

適安堂

窮通有定分流坎無庸悲湘纍自苦亦太隘韓子孤憤
將奚為人生百年渾幾時鼠窺鬼瞰徒成私何如樊川
一樽酒往者莫究今已而秦川如畫渭如絲韋曲杜曲
無聲詩高堂駕空竹樹裡觚稜瀟灑含幽姿起居飲食
頗自適不矯不飾隨所施舉手為謝昌黎師乃今平原
能得之有時高咏歸來辭有時獨酌芙蓉危人間所得
容力取委之順之夫何思

韓監察所藏畫馬

房星降精雲晦明天機滅沒麒麟行逸羣絕足豈易得
側身佇目長風生憶昔周王走八極不惜千金買竒骨
浮雲追電迤邐至千里瑤池才一蹴漢家沙苑唐虎臣
隊色滿山雲錦新只今雄駿竟寂寞轉益愁向駑駘羣
吁嗟冀北亦古國安得天驥曾不聞駕轅伏櫪計必有
王良伯樂誰其人韓卿好古得此圖索遍烏臺好詩客
侵晨打門驚夢覺開卷金石聲噓噓雨中破屋百不遂
才薄何以塞君責此圖一日當飛去看避青驄洛陽陌

游玉泉

少時嘗讀子虛賦愛其胷中雲夢淮湘鄂越歷歷生風
雨我思古人何悠悠遂欲大放心顏揮斥八極鞭九州
誰其捉我坐屋底壯心不死庸有幾玉泉一覲凡五年
風水咫尺如千里孫劉愛厚有嘉招溫詩歷落亦奇士
郗侯俊秀甫遠來騏驥不慚駕與齒借驢肩酒穿村行
雲煙草樹來尋盟初盤山腰探龍窟空明鴻洞玻璃青
買魚醜酒放船入鼇頭掀舞蛟人泣鼓楫敲舷凌浩蕩

崑崖倒影屏風濕君能為我傾倒雙白瓶我欲為君拚
醉一吸復一吸沉竿續蔓不可測黑綠陰深五千尺杳
然心悸身生芒泊岸為著靈運屐攀緣古栢上層巔細
路蜿蜒遶鱸脊萬古風從鳥道來夕陽天影凝空碧解
衣小憇足力生西南更覓丹丘迹人生天地逆旅間貴
無等倫惟有閒功名既不麒麟閣箕穎自合相追攀折
腰摧眉必不已役役沒沒誰爾憐我知此理有定論所
遇所窮或者天東山歌酒乃大起夜郎醉月終其年古

賢出處各有以安吾見在清樽前

觀象詩

此舊作也至元十八年見之于井門張巨源家因錄之

皇帝馬箠開雲南始得一象來中國中國傳聞未嘗見
一日爭覩轟霹靂巨鼻引地六七尺左卷右舒為口役
耳項垂垂倍數牛皮毛蒼蒼艾豸黑目豎青熒鏡有光
背濶隱嶙山之脊卷髮鬢奴鐵作鈎要將驅使驚九州
吾聞國家方寶賢異物自至非所求誰能更上旅獒篇
清風萬古追西周

五言律詩

送劉祥卿之上都

筆硯相從日于今四十年
關山長契濶尊酒暫留連
汾水秋風裏灤江霽雪邊
故人如見問為說已華顛

送張夢符

磊落衣冠舊詩書照眼青
禮闈今妙選憲府昔才名
漢水三千夢錢塘十里亭
殷勤一杯酒江海望澄清

送葉亦愚

向在諸生列孤危斥老姦今逢太平日咫尺拜天顏盡
已都俞際無心用舍間錢塘八九月秋色滿吳山

挽呂丈子謙

憶昔京都日青山拜上庠只今江海外白髮見諸郎行
業誰先後功名竟渺茫無從酌秋草三復白雲章

褒城即席送何侍御

話別京都後音書隨渺茫相逢漢臯上鞍馬又匆忙我
淚狄仁傑君評許子將殷勤一杯酒此去重相望

送某學士

魯齋天下士高弟數君侯立學心恒切居官行益修
旱苗方渴雨健翮正橫秋尊酒何年夜陳登百尺樓

送楊子裕參政赴江西省

世契前朝舊臺聯此日同才謀知緩急肝胆見清忠
江海風煙裏瘡痍煦燠中太平十二策正要沃宸聰

夢弟妹有感

弟妹飄零久羹牆念慮間相逢應有日比老合投閒
夢

逐雞聲斷心隨馬影還清明寒食近煙雨萬重山

順聖溫泉留題有序

戊申歲初年十有七從先大父玉峯靖肅公
來拜祀先隴曾浴于此今初獨來父祖俱棄
世犬馬亦已四十嗟歲月之易得懷先人而
詠嘆丘山零落堂構多慚因留數字以紀歲
月

破塚風霜裏諸孫骯髒邊龜趺埋老蘚翁仲卧荒煙宗

邑嗟誰起文源愧我傳一杯清酌底聊與慰重泉

為唐佐弟壽

兄弟惟君我相看半白頭邇來方聚首今又問行舟風
雨山窻夜雞豚石澗秋此期須有日燈火讀書樓

七言律詩

三次雷苦齋韻二首

年前五月與行臺姜公別於太原之三郊爾
後初留滯居延者凡八月今始還司苦齋憲

副以遊金山寺二詩見示因次其韻復寄姜

公行臺

鞍馬黃塵已強顏更堪白髮鏡中看
曾陪尊俎回春煖
正想音書慰客寒
勝覽足供詩筆健
相思今覺帶圍寬
長江一碧橫千里無復秋風細有瀾

三仕陪從契分深
每高談議豁塵襟
十年脚有隨車雨
一片心無徒木金
晴雲梅花曾漢上
白雲秋水又汾陰
黑河沙土揚州月
別後相思直到今

次男必復韻

心頭何事最相關一片飛雲萬疊山去驛隔年才得信
分司六月不知還身歸造物乘除裏意在經營慘澹間
為報金蘭何侍御別來今已鬢毛斑

奉次明叔趙君見寄詩韻

嘗擬騷人作問天賢愚誰後復誰前塵冠一拂豈徒爾
霜簡千年要凜然自許已知吾計拙並驅那敢子爭先
南風雁足詩來好歸思遙生秋草邊

次重雲儻公韻

山中月影共婆婆發興題詩墨自磨空負有言如鄭直
未能遽止似商訛本來搏擊風稜少此去歸休意思多
且喜居延凡兩月與君時一到無何

壽御史中丞

丞相勲名紀太常君侯忠鯁復騰光青宮意注文貞笏
白簡風生肅政堂守道自當成豹變擊強初不待鷹揚
黑頭事業磨崖頌要共生平日月長

白塔遇表兄劉君

至元七年吾兄劉公之官謙州爾後初亦從事川陝治漢中漢中去謙州不知其幾千里也用是音信隔絕吾兄又遭際變亂艱險百至乃棄家業挈妻子奔竄南來初未之知也十有七年初奉命有事鞏昌因赴京都道出保定白塔驛與吾兄相遇不覺驚喜如對夢寐吾兄雖精神不衰而鬚髮已半白矣乃舉

觴相勞苦吾兄因謂初言余幾死者數矣在
患難中每南望屈指數吾兄弟輩如隔兩世
將謂不復得會聚矣今見吾弟可勝喜我但
收之弟尚在淮上不知當幾何時得相見也
因泣數行初亦歔歔歎念者久之且誦向贈
別吾兄詩云少日驅馳四海心中年憂樂輒
相尋為不誣矣復白兄曰吾兄不愛死艱苦
萬里盡忠本朝為聖天子見知此舌尚在功

名富貴恐迫吾兄耳別離愁苦之思當埽去
乃舉酒上壽作五十六字以侑觴云

蜀道山尖上似天謙河雪片大如綿兵塵瀕洞七千里
音信消沉十一年馬上相逢有今日鏡中驚歎各華顛
幾時收拾田園了風雨燈窻共醉眠

拜詔

五更朝馬簇金溝共待鷄人報曉籌萬國衣冠有今日
九天宮闕照神州紫泥書帶爐香拆赤羽旗隨日影流

一片嵩呼春色裏戴盆何幸望宸旒

拜詔次尚書劉公韻

龍旆霓旌夾兩階九重閭闔一時開
千官花底瞻天拜雙鳳雲間捧詔來
生意根荄如啟蟄歡聲朝野似聞雷
小臣蟻蝨渾無補願酌春江酌壽杯

通明閣

千尺觚稜北斗橫一川煙樹冷雲平
瀛洲方丈知何在渭水終南畫不成
天上碧桃青鳳啄月邊瑤草白龍耕

自憐未斷人間夢赤日黃塵六月行

子陽李兄與余家交三世矣故於初頗相愛念
子陽才疎意廣不屑細務且知時命未偶因放
浪於詩酒泉石之間嘗自趙抵淇由洛陽登華
山至長安而還得詩文二十餘篇皆名公投贈
之什也至元十一年初以事來鎮陽得遂披讀
敬書五十六字以發揮吾子陽襟期之梗槩云
不是孤高不愛官只緣行路古來難一杯徑醉從人笑

萬事無吾着眼看安得暫離塵夢裏
放教高卧冷雲端
此心此話誰能會邂逅青燈幾夜闌

贈答商台符

玉削青尖太華山君家名勝百年間
相公開府今分陝
吾子承家又鑄顏詩似晚江晴浪捲
心如春水白鷗閑
自憐南北成何事粗向交情見一斑

奉贈虛極劉仙翁

聞說秦州地上仙心無一物思飄然
雲山想像俱成畫

杖屨追隨惜未緣引鶴看花秋徑裏枕書聽雨夜窻前
回頭塵土三千丈何處人間有洞天

次韻答左丞揚中齋

每驚塵慮頓成空曾接君侯玉麈風青眼相看文字裏
丹心都在簡書中一時人物誰輕重千古譏評幾異同
明日洪都憲司去不能無意失諸公

子裕參政已還中
省公又戒車北上

青霞觀

花枝歌曲竹勾連中有青眉地上仙清露和香殊旖旎

晚風吹鶴更踟躕只知盡裏今無筆誰信人間別有天
叫斷青鸞飛不到黃塵一隔路三千

得男必復書

來時暑雨拍車頭到日冬煙壓草樓酒為瘴來須強飲
書因家遠屢輕投計回蜀道一千里遍走秦川八九州
咫尺還司敢停脚西南又入劍門秋

挽孟待制駕之

有志明時竟不伸士林公議惜斯人秋風斷鴈從誰託

老木清霜見本真
草草杯盤千里別
悠悠天地一丘塵
題詩忘却傷心處
為是傳家有鳳麟

讀汪氏義武忠烈二碑

宣慰公初聞之久矣
今年夏公枉過余于長
安
客舍不獲款曲為恨
未幾初以事至鞏昌
將謂得奉承言論以償夙昔願見之心也不
數日公復以事詣涼州
曾中鬱鬱未遂快愜
因讀義武忠烈二碑作五十六字書以留之

以為後日與公相會之資云

矯矯風神義與忠堂堂父子隴西公孤城抗節前朝事
萬死開邊此日功上國賢藩俱倚重諸孫此志獨稱雄
兩碑讀罷登高望落日祠堂滿樹風

送梁貢父

少日騫騰鷹脫鞵牂牁秋色上吳鉤五年直到天低處
萬里生還海盡頭尊酒相逢有今日惡懷無復論窮愁
此行敷奏蠻荒了合近天家五鳳樓

挽陳叅卿季淵

文源浩汗接元麻詩律新奇自一家人物百年誰鶚表
秋風孤劍幾龍沙膝橫坡老敲門杖頭戴淵明漉酒紗
恨煞歸來纔幾日白楊原上鬧啼鴉

挽殷僉事獻臣

曾扈龍旗北斗傍遠持使節到扶桑性情邃密希前采
詩筆淋漓近晚唐方倚細陳清淚疏不期便入白雲鄉
傷心千里燕南道落日鴉啼壠樹蒼

次前韻贈雷苦齋侍御

倚遍江湖寺寺樓却乘驄馬到西州心如老栢千年雪
節似蒼崖萬仞秋公議自當歸宿望時評且莫嘆遲留
萱堂強健兒知學底是君侯可用愁

送程侍御鉅夫

一封丹詔九天來御史青驄翰苑才廊廟久勞思稷契
丘園初不望鄒枚定知天下無雙士正在君侯此一迴
自昔楚材為晉用中原麟鳳莫深猜

青宮賜教化參政海青

瀚海東邊百尺崖
崖頭霜鶻矗雲開
紅香曉動千官合
綠漲春圍萬馬來
俊氣共知為異物
老拳真見不凡材
當時寵錫非無意
已有光輝極上台

賜蒙固岱平章海青

海東青鶻氣凌空
錦臂條籠下九重
春水纔溶千頃綠
頭鶻已落半天風
須知神物不易得
自是聖皇酬有功
丞相黑頭誰與比
此心正要答宸衷

張提刑向尹大興天子以二海青寵錫之未幾
拜茲命則知睿眷之有在也於其行作詩以勉
之

龍旗簇仗暖生煙鷲鳥搏空控老拳萬里風頭飛雪急
千官影裏得春偏也知顰笑非徒爾始信澄清不偶然
為報山鷄莫回首雄心長在碧雲邊

吾鄉之崖有以青得名者余嘗取以自號至元
十四年偕御史國瑞外郎周卿有東州之行道

出閩州閩之南二十餘里佛閣突兀因周覽形
勝得河南人王子京青崖石刻不知閩之崖與
吾鄉之崖一而二者耶抑海內一家山川脉絡
同一元氣二而一者耶或其偶與之合耶乃書
此以識

遙遙閣道倚空青湛湛澄江練影橫千佛參差半天上
四山環合一川平雲間煙火無閒地畫裏昇平有此行
鄉國三年六千里偶於仙苑見崖名

留別憲府諸公

五年驄馬顏何厚一日天恩愧不任
共道相從有知己定交何必到分金
兩行清淚三年別一片白雲千里心
珍重鳳凰池上客明朝走馬蜀山深

寄商左山

清明後數日陪姚雪齋張鄰野雅集於匏瓜
亭偶得五十六字奉呈左山相公千里一笑

麗澤門西十里亭記從別後幾清明梯航遐國歸籌畫

柱石中朝望老成滿眼青山連夜夢一尊明月兩鄉情
花時更向東臯醉腸斷雲間百二城

欽定四庫全書

青崖集卷二

元魏初撰

六言詩

奉答廉公勸農

廉君以御史弘道六言二詩見示因次其韻
又作廿八字奉送吾同寮太原之行

小烘茶瓶帶臘新封酒甕迎和醉裏西山南浦眼前仰
嶺高堦

滿眼江山圖畫五年風浪窮船誦讀愁無眼力栽培正
在心田

章江晴綠逐春生鐵樹祠前有此行人笑青崖癡老子
愛君古意未忘情

港口舟行是日室人生日寄此為壽

歲歲逢君此日相望長在他州風雨吳頭楚尾五年才
共行舟

今歲纜春又別洗粧應在書樓細卜歸來消息荔枝紅

徹迎秋

七言絕句

贈高道凝

侍御道凝之尊君侍郎先生在中統末建元之
前十年我先大夫玉峯被召薦中州名士大夫
六七十人有曰西京高聖舉年三十已上博學
善屬文通世務有器識廉介有守可使臨財亦
可以臨政歲丙辰遺山元先生入燕初朝夕奉

杖屨曾聞其說今之能文者李之和髙聖舉人
莫之識也自後初嘗求先生之文如記如序如
詩文徃徃讀之不能舍去道凝初相識歲久未
嘗以事相接至元二十年初承乏江西憲司道
凝已彌綸省閱有日矣用是得款奉言教今行
臺金陵敢以四絕句歌詠其梗概云

吏部真純玉不如濟時心徹五雲車中州名品存公議
先子垂亡有薦書

吏部文章不近名，悠然流水與雲行。
百年文柄遺山在，曾道波瀾獨老成。

中郎才業自家傳，際遇青宮倚注偏。
最愛兩年無一事，雍容籌筆直如椽。

江南驄馬舊知名，共喜金陵有此行。
去去鳳凰臺上月，拍江風雨聽秋聲。

贈李吉甫

故人相見眼增明，尊酒殷勤且未平。
恨煞簿書塵土裏，

兩年寂寞度秦城

贈史子桓

泣血尋親白髮兒
牛腰半是昔人詩
傷心四十年前夢
一片白雲無了時

贈宋碧湖

碧湖老子識朝賢
白璧明珠有此篇
青眼相看豈虛語
不妨收是買山錢

趙伯恭母八十

養心戒飲不易得誠獄平反陰有功聖善壽徵應在此
百年無日不春風

峽山寺

壁破深青太華雲中浮濃綠是通津畫圖盡有江山在

紺碧瑤環恐未真

寺傳有袁氏
玉環故事

宣德

曾侍蒲輪四月行入冬風雪哭銘旌到今三十餘年事
依舊山園水遶城

寄揚州金使君

兩年不到摘星樓，鴈隔江聲送客愁。
昨夜金山船上月，澹隨帆影過中秋。

柳潭垂釣

陰陰楊柳一絲風，脚底行雲在鏡中。
不為君王肯同載，便將烟樹換齊東。

巡按京兆口占二首

二月五日巡按京兆諸君祖道漢中城北醉

中口占二絕至陳倉書付金州邸萬戶之第

二子持去

憶昨春風石馬園

園有石馬二不知何代墳也

偶因離別却成歡杯

行交錯殊無意酒到轟騰不屬官

此別分司拚數日渾教聚首是三年臣門如市心如水
有底藩籬不醉眠

記昔

寶殿光輝記昔遊川原風物入悲愁兒時曾識東園老

彈指中間到白頭

望漢王城

漢水之北有原峻削其上砥平土人以漢王
城目之至元十五年因課農登法隆院閣時
山雨乍晴綠野平遠在奔走羈鞅中得凭高
佇目亦一快也乃書此以識

陰陰樓閣復層層
脚底風烟綠樹平行到上方
人不見
倚闌獨有漢王城

獨石

打頭土屋椽如漆容膝荆牀雨似秋分倒一杯糜子酒
幾時能近鳳凰樓

洋州公宇讀文與可蘇東坡詩刻

篔簹太守雪堂詩花滿亭臺酒滿池今日水空花老盡
一庭秋草冑蟲絲

宋氏家藏花光墨梅

人說花光物外仙文章豪客欲移船春風留在三花樹

要與東溪結後緣

東溪總尹漢臣自號也亦善於梅事故云

寒食不出

想得西湖放滿船
御街楊柳已生烟
輕風細雨無人到
獨立海棠花樹邊

冬除

行役經秋未到家
入冬消息望燈花
擁衾坐數更籌了
明日春生喜有涯

贈筆工李子昭

廣寒秋穎雪離披湯沐中書舊有期千古管城今樂地
未應人笑是書癡

雲中郡賦雲中一首

雲中近代稱名郡樓閣風烟亦可觀一上官庭傳德語
文書如湧事如攢

獻龜

六月二十二日子降日也青溪早發舟人以

龜來獻

自嘆元非搏擊才
海南歸棹趁風回
一杯湯餅逢今日
獨有河神獻壽來

放龜

繞足青毛背縷金
未應無意出江深
從今去去清淵底
珍重千年共此心

送李兩山

南來喜見兩山詩
袖裡春風鬢欲絲
明日朝京五千里
正如賈誼入關時

送李鶴田

樂章十二見才情掛劍文章老更成
吉水一椽茅屋在不妨高卧看秋耕

送敬伯仁

床頭白酒屋頭山未老誰能得此閒
收拾寧山哭麟解更休容易向人間

送耶律百強

不是孤高不愛官過庭長恐負清歡
一盃菽水還家日

衰俗中間得此難

送楊季海

交親零落鬢如絲
兩袖秋風一束詩
明日還家有人問
青衫不似讀書時

險阻艱難四十年
西溪詩筆舊情緣
珠簾寂寞西山雨
又逐孤燈上客船

豐州

五更騎馬望明星
細草坡陀迤邐行
一片長川天不盡

蒼花如雪近豐城

溪亭午憩

傍溪亭子蔭龜魚花竹迷藏畫不如檢點江頭春事了
不妨高枕卧看書

三徑納涼

闌干歌曲護羣芳恐似陶家欲就荒日午坐來松影合
南風吹雨似秋涼

題陰德記後

大定間漳州董公為道源李先生撰陰德記
書二本一備史館採訪遺逸一遺其子師孟
俾知仕進之所來由嗚呼前輩喜人為善且
樂於激勸其意味乃如此道源先生之遇不
遇雖與文正公不同志則一也其為人必不
凡故為時輩所重敢作詩以識之

不為良相願為醫落落胸中亦自竒一片活人心思在
百年名筆有真知

峽山寺別雲憲使文宣慰詩人李梅南

來時船疾不曾登去日星飛又促行徑為諸公暫留別
四更燒燭看題名

代州別劉雲溪公

愛我疏愚獨數君愛君真實更何人相逢不惜相將去
醉倒玉壺別有春

寄遠別

千里長河五年戍萬山風雪斷來音屋頭昨夜霜如席

愁折金闈一寸心

田家謠

五月軍回未有期
不禁烟瘴入枯脾
馬頭一骨還家日
只有弓刀似舊時

為戴秀才題張騫乘槎圖

一片枯槎物外仙
浪花如雪水如烟
只應直到天開處
冷笑閒橫盡日船

新寨二首

萬事乘除不可期此行休怪到家遲
千山萬水秋光裡
盡是君家得意時

送別交親有所思却愁騎馬到家時
從渠看得青山飽
人事如今不要詩

弘州

百年雄傑玉屏老疑有英靈在此間
幾日隣鄉買田了
閑時騎馬看南山

出湓浦寄劉牧之

九江一月又吳東千里青山半日風
昨晚看潮亭子上
一尊白酒與君同

胡仲濱益堅齋

不為求名效獨醒
不緣蹭蹬便忘形
留教吏部文章在
盡是君家座右銘

宿神溪

千丈危巔鳥道斜
萬山深處有人家
年來常有催租吏
却恨溪流片片花

醉吟

一別醉鄉千古夢無邊
塵事百年身青山滿眼花如錦
莫遣劉伶笑殺人

杜止軒詞翰

方朔才名語意新
枚之風調筆如神
龐眉苦節秋風客
未必如公出處真

十月見嬉子戲成

蟄後垂纖見亦奇
只應佳信示前知
牀頭鏡子拈來看

未分清霜入鬢絲

松澗張君

老澗陰深百丈崖
崖巔松影矗雲開
幾時得向松間醉
細聽秋聲帶雨來

梅坡張君

曲水亭邊酒一卮
風流文雅記當時
而今西去船頭月
除有梅坡五字詩

竹山張君

山上亭亭竹萬竿
山前花木曲闌干
高情誰似山人好
教子讀書不覓官

竹

冷拂苔痕綠影香
細抽空碧出鄰牆
風來瑟瑟驚秋寂
雨過稍稍弄晚涼

送僧遊蜀

峨眉山色錦江春
劍壁空嵐玉壘塵
別後登臨有佳句
不妨忙却坐禪身

港口舟行

雞犬山田計未成
白頭又有海南行
只應湯餅逢今日
兒女相看話此情

送周集賢正平致仕東歸

江山如畫四時春
獨有壘陵氣象真
館閣風流有今日
鹿庵之後更何人

寄耿伯玉臺掾

愛君情味唱君詞
一別秦亭有所思
碧玉盤盤荔枝酒

夾城花暗獨來時

嘉慶圖

小小瑤華楚楚蘭茶芽
瓶子荔枝盤太平三百年前事
猶及江南畫裏看

劉漢卿蓮社圖

不為廬山面目真
不因詩酒自由身
高情未落龍眠筆
元是羲皇向上人

畢舜舉蘭亭圖

歷井捫參蜀道難扁舟江海又狂瀾昔賢觴詠今無復
畫裏風流亦好看

伏生授書圖

心傳心學見都俞秦火燒來一字無若道漢儒無補益
如何留在授書圖

韓君美所藏支遁觀馬圖

千金竒骨豈易得方外若人猶爾憐自是龍眠有深意
不應叅作畫中禪

王武子看馬圖

深院移牀簇侍兒
高盤雲髻綠絲絲
情知攙下駕駘骨
不到渠家入看時

題楊國寶藏畫馬圖

黃馬昂頭似喙烏
墨雲滿身千里駒
而今沙苑春風裏
落日晴蕪澹碧鋪

鴈鷺圖

晴溪沙暖鴛鴦睡
小塢花濃蛺蝶飛
誰畫賓鴻與饑鷺

澹香疎荻雨霏霏

題楊國寶鵲華風雨圖

簿書堆山日停午坐久髭鬚滿塵土爭如六月濟南間
鵲華峰頭看風雨

宋上皇詩意圖

月落風煙變古今畫圖今見入清吟可憐意象經營日
不到蒼生未了心

馬嵬

九齡既罷事已矣偃月堂深禍更深縱把霓裳都拂去
未應邊馬不駸駸

春草坡前萬馬塵麝香猶帶荔枝新思量前日盤中舞
含笑君王是路人

卜彥才所藏赤壁圖

江山人物記當時再得坡仙境益竒今日披圖見高興
簿書慚愧鬢如絲

出西鄉

人歌人笑上茶園
花淡花濃隔稻田
十日按行秋色裏
畫圖才出武陵川

越王臺

春風青草越王臺
腳底連雲海
船回萬國昇平有今日
笑人陸賈奉書來

葵堤散步

堤上葵花爛錦光
晚風吹袖獨彷徨
不應畎畝棲遲處
忘却傾心向太陽

送別

去國十年鴈影秋又逢離別可堪愁
猿聲一道巴山黑
黃葉孤城月滿樓

贈史紫微參政

王濬樓船一夕風順流
聲勢下江東
誰知更有如椽筆
氣壓吳山第一峰

郊行

入山深處更山深
一片晴波一片金
莫道人家不成畫

羊牛都在綠楊陰

題竹林七賢圖

滄海橫流百戰身
此心獨有醉鄉真
逢君莫怪清狂客
辛苦潘郎拜路塵

書字崖

溝上蒼崖丈五高
昔人題此說邊勞
到今二百年來許
一片空園半野蒿

梅嶺前人有詩
上得梅山不見梅
又云着俸買

栽三十本清香留與雪中開因次其韻

南海城邊奉使回
庾關曾記嶺頭梅
自憐心似千山雪
不見清香次第開

題牧牛圖

流水蒼烟綠樹坡
青山牛背飽經過
生平儘有安排處
辛苦齊人扣角歌

凌德榮竹石圖

翠影抽空弄晚涼
雨苔含碧漬秋光
漫山桃李春風底

不似幽人意味長

寄答雷按察

中州元氣文章伯四海今知有使君
一片濟時心未了
風稜亦足張吾軍

行役匆匆力未任
欲因衰懶事幽尋
詩來重謝多提獎
跋斃何堪有此心

題盛教諭家藏山水圖

剪破湘雲一片春
澹橫濃遠總宜人
幾時跳出黃塵去

此畫中間着此身

瞿塘圖

瞿塘事去已千古蘆荻花飛兩岸秋四海昇平有今日
卧吹簫管到杭州

油井

細溜津津湧石尖雲腴隱隱復暹暹銀缸滿貯燃燈坐
似向東川看井鹽

百井

才出并州第一程，凭高百井見孤城。
瀟瀟風色今如此，却憶梅花雪裏行。

懷古

人道梁山是帝墟，石樓苔雨上金鋪。
千年留得降王在，辛苦昭陵六馬圖。

乾陵前有東西班共六十四人衣冠各異皆刻本國王名及所受唐職云

題李吉甫所藏寥休詩軸

誰道寥休與世疏，青天推上六龍車。
看來詩筆今如此，着白山人恐未如。

徽州學正胡泳子游自京都來過予於維揚以
士常中郎長詩見示又省掾王約彥博謂子游
文筆有中州氣象用是不敢以常書生遇之十
月復會於杭且以樂府辱貺將挈舟歸江東因
作二十八字以贈

冠無獬豸帶無魚鶴步芹宮足自如一片青山滿船月
不妨讀盡晦翁書

挽宋海印居士二首

詩酒交親半老臣
田園成趣自由身
回頭行路風波裏
得似先生有幾人

揚柳陰陰拂綠苔
杏花寂寂向誰開
黃梁夢覺知何處
白玉樓成不更來

九日對菊憶姜霍二使君

秋意生香簇綠雲
土膏栽滿石頭盆
誰憐白髮人千里
獨對青山酒一尊

高樹圍前射箭時
小書樓上共題詩
揚州燈火京城夜

獨立秋風有所思

渾源

曾從仙子看南山
玉井波深雪色寒
今日重來三十載
兒郎騎馬是清官

三角城

靈夏兵塵百戰塵
城根石壁矗雲高
當時遺老今猶在
說是山前有界濠

挽姨兄尚書劉公五首

外家宅相悲零落母氏風流記阿姨獨有吾兄今又去
百年親話更誰知

高粱河上十年別白塔亭前再見時萬里風沙顏色黑
敝裘如結鬢如絲

鐵石心腸報主知一生一死隔毫釐旌旗日影丹墀上
三拜尚書亦自奇

牧之萍梗寄吳東南北音容只夢中莫恨終天曾不見
天高留付若堂封

中郎堂上尚書宅才得從容又別離今日歸來亦衰病
兩園秋草不勝悲

許左丞哀挽

至元戊辰嘗從先生入京見先生敷奏如學知
生知之說人心道心之論皆款曲至到雖承
詰問辭氣自如繼掌大政辭不受祿今雖云
亡令人慚仰不肖頗辱教愛敢作詩以哭之
順聖魏初技淚書

學道躬行意味真愛君辭氣見忠純
千秋萬古先賢傳
合作中朝第一人

挽李仲常運使

劍門秋色記分司煮茗西湖晚誦詩
青眼如君幾人在
不因鞭策獨傷時

挽司農侯伯祿

人誇鐵面自河東晚歲潛心理性中
一日歸來便長往
幾人終始得如公

挽趙教授

馬鬣封前乏妙辭
牛腰卷裏又題詩
傷心故老凋零盡
誰說宮門唱第時

挽夾谷士常

公事關心每盡勤
文章細意見為人
野齋不負為知己
馬鬣封頭筆有神

挽宋漢臣鑑山

長安醉倒十年餘
老木清霜一夢如
前輩風流幾人在

鑑山詩卷有圖書

挽輔正臣

讀徹閩人痛哭詩風流遺愛見新詞
傷心御史青驄馬今日行行避有誰

悼亡姬

草堂一覺巫山夢行雨行雲今不知
半夜青燈兩行淚催粧猶記去年時

廉泉

廉泉喬木出氛埃
聞道平章手自栽
一銜綠衣人不見
依依如待相公來

滕州王直卿父母八十之壽

人生偕老古猶稀
八十相看一與齊
有子有孫家事了
千年雙鶴上天梯

成美堂

偃蹇昂藏頗自竒
與人成美不求知
黃金鑄就官街屋
不及傳家一軸詩

子午渡早發

五葉葵花盃口平
虎蹄新過樹無聲
三年按部成何事
才見山王遠避行

汝郎川

汝郎川闊草油油
秃尾河淤一漫流
行上沙岡人不見
黍田平碧澹生秋

秋江晚景

老樹蒼崖漬雨秋
布帆風滿夕陽舟
生平一半江湖夢

不到元龍百尺樓

池荷衰颯菊芬芳策杖吟詩上草堂
滿目暮雲風捲盡
郡樓寒角數聲長

佚老堂為庸齋薛先生題

人海抽身得自由只隨耆舊見風流
而今冠蓋長安道
老死黃塵不肯休

書王伯堅尚書海棠詩卷

栢鄉花好入詩傳夢裡石家錦障鮮
記與使君曾共醉

江郊亭下水如天

江郊栢鄉之園名也樹下有池如浸爛錦伯堅尚書以夢符海棠長詩見

示有栢鄉三樹尤堪誇之句因書二十八字以識拜觀之歲月至元辛卯七月四日

甘泉

羊牛幾點土空黑
盡日人烟不數家
賴得甘泉城外道
洛波如練帶川斜

府谷

行行春雨復秋烟
西去長安又幾千
落日空庭望南北
黃河城下水連天

解仲傑景陶軒

梨花澹澹柳絲絲
午夢醒來半醉時
門外紅塵三百丈
至人高卧看陶詩

愚軒

牀頭白酒屋頭山
數冊閒書竹兩竿
張目不知人說似
門前騎馬是高官

蕭御史公琰

章章綿蕤叔孫通
矯矯麒麟御史驄
四海昇平有今日

更須危論沃宸聰

順聖先壠拜祀後有述十首

譜牒從姬舊有傳移家桑水憶當年只緣遺澤今仍在
留得諸孫拜墓前

菽水承顏盡所歡傳家風土占高寒力田桑梓供租了
孝弟讀書事最難

袖裏春風事藹然不爭功利不爭賢蘇州一說天機在
南北無兵四十年

不愛君家億萬貲
求師教子動京師
春風丹桂三千尺
秀出十郎更兩枝

操藝逢時與命違
恬然心思不求知
兩魁文賦今仍在
正是諸孫墮淚碑

河北兵塵撥不開
河南撐住數奇才
邾城一死人爭惜
不到褒忠廟裏來

羽書南北無消息
山壓孤城破卯時
一片丹心倚天地
未應巡遠是男兒

危節中間奉節行堂堂忠義見平生歸來杖屨林泉下
誰遣天朝識姓名

詩禮庭闈少日情亂來風雨一燈青慙懃著就三千字
留與諸孫見典刑

丘山零落愧何窮堂構空存慘澹中倚日青松一千樹
石鯨鱗甲動秋風

東峽

青崖直上聳蒼烟東峽中邊盡水田賣劍買牛吾有意

會須桑梓似當年

馬謙甫頤貞齋

不必區區名利場
恰將真偽試論量
捫心有愧秋風屋
便與山雷是兩鄉

賦

三秋霽賦

并序

丙辰春正月不雨夏四月不雨秋七月雨
之明日霽僕也感萬物之得時傷所懷而未

遇遂與客登燕昭之故城而眺焉草木林莽
川原隴坂文文質質千種百品若有喜涼風
順白露私分成遂有期而不尤怨於天地間
者僕于是心攝神靜氣浩志定而向之所感
一掃而無幾矣孟軻氏所謂舍之者非也助
之長者亦非也槩於此有得焉因一賦云

羲和烜赫以鞭馭兮扇乾坤於一鑠奈時令之靡常兮
忽金精之炳爍起燭龍之久蟠兮吸滄海其如勺沛甘

澤於四野兮俾死者而復作扶桑曉兮白日升清風發
兮重光明無山阿與陵陸遞改色而增榮田千里兮咫
尺黍離離而變青如行役之調飢獲壺飧與豆羹太行
掃碧以西鶩碣石東峙其崢嶸漁散舟於岸曲席翻明
而漾輕林陰疏而逗日見行客之營營駭蟠螭之焜燿
奄東天而橫掣忽空中之白鳥亂晚風之晴雪高者隆
低者偃顯者近微者遠無甘苦與強弱齊結實而錯落
皞皞乎如三代之民兮不知孰為之然孰使之若也予

於是悚然中以外變情因迹移鼓腹長嘯神和氣怡知
昨非而今是諒窮通之有時舉酒飲客侑之以詩釣寂
寞之濱兮魚鱗可食登巉巖之嶺兮雲輕可衣有書而
讀無疾而嬉富與貴兮貧與卑得不得兮吾何知客曰
蕭瑟兮草木搖落而變衰悵慄兮若將遠行登山臨水
兮送將歸此非楚大夫宋玉之辭歟蓋秋之為氣肅殺
寒涼似乎叔世君昏政荒故商婦起琵琶之怨逐臣多
去國之傷今子以可悲者樂可戚者洋洋何也余徐應

客曰蒹葭蒼蒼白露為霜匪霜而蒼為妖為殃匪蒼而
用為怪為狂知垂綸採芝者非示潔則知走高門要大
駕者不足揚此天之理所以一吾之理所以常固亘
千載而彌光者也客亦驚悟形神兩忘但烟汀之去鴈
空夕草之寒蟿



